

出使美日秘國日記

出使美日祕崔日記

十月初一日 大吉晴

金山延律師利亞頓來美都駁詰苛制華人來美之例因來見言
已控諸總察院大約七日後可定奪也因詢以美義兩國交涉之
案利亞頓云美國之意欲以待中國者待義國至今未聞轉圜因
曰義國將聽之否利亞頓曰向來各國交涉之事以強弱爲權衡
義國海軍強於美未必甘心受之且看以後如何耳談許久乃辭
去 因謹按利亞頓以強弱論交涉則不徒論理而論勢矣義國
海軍強於美未必甘心受之然則義國海軍弱於美將甘心受之
耶因以爲弱者受之非必甘心特不能不受耳有國者不可以不

強

初二日晴

至外部大臣布連宅謝步又至律師利亞頓處在座美國官紳二人言法國近爲日本造鋼甲戰艦三艘均容四千二百七十八噸又水雷船一艘又擬籌銀九百萬磅添造新式鐵艦十一艘聞日本因此次中國兵船至橫濱自知海軍不及且僅有致意達一船每半時能行六十里其餘均係舊式故不敢不添造也談久因先告辭因謹按此海軍之效也前此日本覬覦臺灣猝以兵船運兵犯境中國海軍未立措手不及至費銀五十萬兩今海軍漸強日本深懼報復故急於籌添如所添之船告竣中國海軍又似不

及應審彼己之勢及早圖之

初三日 晴中夜大雪

接北洋大臣電云吉林將軍電現派員在滬向禮和洋行購美國十三響八轉箭馬更快槍千枝請轉電駐美星使於起運時查驗是否新造有無用過及工料不精云鴻冬當卽函致紐約並飭緝譯查明該槍出自何廠以便察驗 巴黎來電言俄君前日由丹國回俄德主以伯林爲火車必由之路訂與相晤俄君乃乘輪船旋繞避之不與相見其不治之意顯然云 因謹按此法人之所深喜也俄德不睦則德須防俄而法人高枕矣

初四日 大雪至地而化午刻止

從前歐洲各國畏俄之強而蠶食屢次聯盟不准俄國兵船出黑海以達地中海近有俄商輪船公司藉開西比里亞鐵路載鐵路器具竟由黑海而出土耳其阻之俄國駐土公使駁之仍准放行各國皆詫異云 因謹按此俄人之覬覦歐洲也由是以觀則其與法聯盟也實爲遠交之計其與德傲睨也或爲近攻之謀若英法各國不能合力一心與俄毗連之邦必有挫師失地者矣

初五日晴

查俄商輪船公司雖稱商船實兵船也共計十三四艘容一千二百噸至三千四百噸不等每半時行四十餘里至五十餘里不等載礮六英寸至八英寸六尊至八尊不等近年又在英國添購二

艘各容五千噸每半時行六十里此十餘船可容二萬數千人一有戰事可以運調一軍之衆云 因查歐墨各洲近日風氣新造商船均用兵船之式所以備開戰時擄敵國之商船而不爲敵國所擄也故商船多之國其兵船亦強英之商船俄法二國合之猶不及也中國兵船多於日本而商船遜之則以無航海之商船長江商船之利爲英商奪三分之二故也

初六日晴

九月二十二日報云俄國自知水師不敵英法欲從事歐洲則英阻之必水師強盛乃可勝英因是加意船塢戰艦以期得志於土耳其波斯高麗等處云 因案俄地環繞北冰洋其形如缺只以

一面當敵其強以此也然其地苦寒一年之內海水冰者半年欲設船陽實無其地其水師之不如英法亦以此也今欲增戰艦但能籌費固可驟增若船隔則限於天時地氣俄人果何道以籌之其必出歐洲之黑海而圖亞洲之東三省乎是宜防之

初七日晴

前因美國駐巴拿馬領事阿丹信實心保護華人奏請

賞給寶星業已頒到外部大臣亦回美都今日備文因親送交布連布連甚悅且云俟開議院時屬議院議准即發交該領事收并先代

謝云 新報言金山華人陳某槍傷美人二名并斃巡捕一名華

人不安分至於如此欲嚴苛禁之例必不能矣 因嘗見美下議院好德其人蓋持正而不附工黨者其論亦極持平嘗謂中國富商不至美其至美爲商者大抵始於工而繼爲商者也又間有干名犯義而不容於鄉里者以美爲遁逃主也美於工固宜禁然宜商之中國立約以禁之不宜廢約而直遂徑行也因觀於現在金山華人陳某而益信

初八日晴夜雨

上議院紳多福偕科司達來見科司達言總察院於華商領照之例尙待妥商多福言美國禁工苛例殊爲背約華人性儉耐勞可惜良莠不齊好爲讎殺又好洋煙故工黨得以藉口因答以美國

刑律太寬故華人玩之如獲兇犯交中國自行辦理可做刁風多
福云此條約所無當時並未慮及談久而去 因謹按多福之言
尙爲持平華人如能安分美國當有正直之人爲之平反今工黨
既惡其攙奪生計而官紳又惡其敗壞風俗難乎免矣

初九日 細雨天氣燥熱

本日新報云奧廷商之議院籌撥巨款添設礮隊修築毗連俄界
之礮臺以防俄云 因查歐洲各國遣使分駐通問不絕其君亦
時時相見情好常通似無慮啟釁矣而兵額日益兵艦日增兵費
亦日加戰戰兢兢時若有強鄰壓境之勢至於今而尤甚其斯爲
亡者保其存乎然而民生苦矣

初十日陰

是日寅刻興盟漱朝服率參贊等員於卯初恭祝

皇太后萬壽行三跪九叩禮朝鮮使臣李采淵亦到與醺
載英皇今年七旬有五精神矍鑠其孫已充兵船統領云

十一日晴

會匪鬧教一案我中國當事爲之保護既事爲之緝匪且允賠卹
邦交之道盡矣聞英法等國尙要求無厭合以謀我因憶本年夏
間俄國發配罪犯於西比里亞地方監禁乃該犯等逸出十五人
遇法國兵官聚而殺之俄員卽通知法國兵艦爲之斂埋兵艦以
西樂送葬及其旋船樂工首領又爲該犯所斃俄不議卹法不索

賠交鄰之道如斯而已然則公法條約惟勢強者可執言耳

十二日晴

答拜上議院紳多福該紳尙持正論言前此美邦殺斃義國民人一案已允賠卹但數甚微俟開議院時由議紳議准卽照覆義外部矣又言中國教案美國無意作難現在駐中國之兵船名下厘頭已調赴檀香山矣談久而散遂至科司達處因查紐阿連命案其初美政府持之甚堅非眞昧彼己強弱之形也嘗試而已至於義廷必不干休則願議賠議卹旁觀者固早知其必出於此矣布連尙有煩言其意固別有在蓋明年卽保舉總統之年也

十三日晴

十一日報言巴黎來電俄君山丹回俄拒德君不與見本月爲俄君娶后之二十五年俄國駐德公使率隨員於使署行慶賀禮各國駐德公使亦赴俄使署道喜惟德未派員往似德俄兩主有不合形迹云 因查交涉之道歐洲各國常使持平其於利益固不讓矣卽禮節之細微者亦不讓焉非好爭也不能持平而時時讓人習而慣焉他國直以爲應不持平敢侮予矣俄君與德主約晤而問道還俄是失信於德也德亦有以報之使俄知德之不可玩也庶幾不示怯也

十四日 晴夜小雨

英商集股由緬甸創造鐵路直達中國邊界聞每一英里需銀十

二萬五千圓俄國琿春鐵路現在築路兵士二千五百名罪犯九百名工人四百名中國高麗工人一千七百名俄國石匠一百二十六名中國石匠三百名共約六千名且設醫院治病以求迅速因謹按此所謂實逼處此也英法逼於南俄人逼於北事雖未動機則已形彼族皆藉口通商也果僅通商乎哉

十五日 小雨

聞暹羅朝廷新創一例收中國人身稅現已議准夫暹羅中國之藩屬也中國以字小爲心而暹羅不以事大爲禮豈夜郎自大哉蓋自日本并琉球法人踞越南英人取緬甸暹羅知中國之兵力不行於四裔故悍然自由耳

十六日 晴大風雨有冰

律師科司達來書言劉道表之案總察院已准擬至吏部覆訊當
卽函知金山領事 湖廣總督張之 來電云惠人星使鑒請代
辦好棉子二頓速寄漢口價卽滙還至咸洞咸當卽派參贊彭光
譽繙譯容揆向副戶部大臣處查明又飭紐約領事沈栢詳查

因少時讀書於山寺山多種竹時際兵燹之後徧地荒蕪竹亦枯
瘦山僧經理之越三年而葉密陰濃柯巨如碗因詢其故僧曰吾
刪其穢而培其根根肥則笋肥笋肥則竹肥其次年乃伐其瘦而
留其肥則根益肥竹亦愈肥如此三年而竹復舊觀矣不善種者
反是因查美國棉子中國之購者多矣而終不及美者則人事之

不齊也其殆如生質之美者必進之以學乎

十七日 始冰晴

巴黎來電言奧王與廷臣論歐洲時局謂俄人將乘飢動兵法亦整頓軍務不遺餘力乘隙而逞德奧義三國皆稔知之惟俄國府庫空虛如三國合力與戰當可得志云云 中國會匪鬧教英法德三國既約美國聯盟要挾聞日本亦附和之因謁外部大臣布連曰美國向爲仁義之邦不爲囑喝要挾之謀聞之久矣布連曰然因曰中國會匪鬧教業允賠償聞歐洲各國約美聯合水師以肆要挾美亦爲之乎布連曰未允也 因曰若是則因當函達中國政府矣布連曰可遂辭出

十八日晴

今年春夏之交美廷派員赴歐洲查客民來美情形有員名蘇泰士者在歐洲扮作窮民向英國招人出洋局請給赴美川資該局卽發銀五圓六角二分蘇卽附雪惠阿輪船三等艙至紐約登岸後告知該埠官員并告美廷以歐洲各處招人來美之局甚多卽請議院迅速設法立例嚴禁歐洲無業窮民不准入境云 因謹按美廷以他國窮民入境有礙昇平之局遂派員詳查茲查得來美工人不止中國并禁歐洲各邦此例若行歐洲不能辨詰則中國更難置辭矣

十九日晴

昨日伯林來電言德國兵部趕製帳篷以備東邊防兵之用倫敦來電言俄國駐芬蘭之兵調赴奧界而另募新兵駐守芬蘭云因謹按歐洲各國蓋無一日而忘戰也俄人伺間乘釁以冀蠶食鄰封凡毗連之小國如波蘭芬蘭勃爾加厘亞等國蓋無一能自存矣國之大者如德與奧及土耳其元兢兢以防俄爲事而懼兵力不敵故德與奧聯盟而土耳其則仰庇於英國此合縱之勢也強俄不戢歐亞兩洲其無安枕之時乎

二十日 晴天氣轉暖

謁律司科士達以中國所發華商之護照金山稅關有意挑剔因言美國既顯禁華工又陰阻華商殊違中美和約第六款今議院

將開應照會外部請問其故且禁工苛例自前任張使駁詰迄今已過三年何以尙無回覆因前此已面詢外部大臣布連布連答以必覆今又兩旬矣亦擬催之撰葉請商科司達以爲是遂留葉候酌定又謁上議院紳多福

二十一日晴

美總統於十六日出都赴白耳底馬地方昨日已回 昨日巴黎來電俄外部抵巴黎俄國駐法公使率隨員迎於車廡法外部亦派人往迎是晚法總統設醺欸之本日巴黎來電法國銀行已貸銀一百五十兆羅卜合七千萬餘兩於俄或以爲俄外部爲貸銀或以爲實聯盟也 因謹按此必聯盟也貸銀爲戶部之事外部

何必親行哉或藉是以爲掩飾耳

二十二日

晴午刻大風暴吹倒房屋壓斃之人甚多總統官殿所建之旗爲風裂破未後仍舊見日風未息

俄國向德貸銀八百萬磅德商商之政府德主以爲當此時勢不應代籌遂止 因謹按俄法之交方密其意必將修怨於德德如爲之貸欸是藉寇兵而資盜糧也德主所見誠是矣然非禦敵之方確有把握則卽因此啟釁亦未可知如以弱小者當之有不進退維谷乎甚矣立國之貴自強也

二十三日晴

日本來電云派兵艦赴中國從英法之約也領事沈桓接上海信歐洲各國兵船集上海者約四十艘因急謁外部布連詢以前言

不與歐洲各國聯盟要挾中國斯言信否布連曰美與中國交情與歐洲各國不同安肯聯盟要挾因曰審若是請發一電與駐中國公使田貝俾中國政府知美國之意則善矣布連曰美政府業行文與田貝令勿與各國聯絡今既欲速卽發電可也因謝之遂辭出回使館卽發電致總理衙門云各國聯合兵船要挾教案因見外部外部允電田貝不與聯合云 因按布連虎視鷹顧城府深邃寡言笑蓋梟雄也當爲議紳時卽昌言禁華工非有所惡於華工也要結工黨而已亦非有所愛於工黨也求得保舉而已上次公舉總統布連名居第二爲哈利順所奪卽現任之總統是也布連任外部長於交涉之事皆好勝祕林海峽一案總統倡之而

布連助之遂至與英齟齬進退維谷智利殺斃美兵船水手布連主戰義大利民人在美被戕布連立意不認賠卹禁華工事亦主從嚴因與交涉諸事尙少阻撓惟駁禁工例則不見覆蓋決不敢開罪於工黨也

二十四日晴

金山來電言差那輪船由橫濱回聞俄兵一隊由西比里亞進侵中國邊界中國雖不與決裂或失地云因謹按中國西比界曠野之地二百年來俄人所蠶食者多矣此積弊也顧以前相距猶遠今則漸至逼近而俄又造鐵路兵力可及東三省其可虞乎二十五日晴

昨晚接總署覆電云各國聯兵要挾教案其事漸息何以此時始
商外部是否又有萌動抑新聞所刊敬當卽覆電云沈稟兵船集
滬美報日艦聯歐赴華故慮因

二十六日晴

是日戌刻赴上議院紳多福之席同席者副外部華頓水師大臣
脫來施上議院紳七人各國公使六人又主人之壻席間聞美國
派員查明歐洲窮民來美情形擬由議院立例禁止而歐洲各國
亦已共約派員至巴黎會商自禁之策亥正而散 因查多福與
密組爲同省密組惡華人而多福持正論志不同也然工黨與舉
總統議紳過此以往附工黨者必益衆而華人勢孤矣

二十七日晴是夜微雪

本日倫敦來電云俄外部大臣與法廷訂約之事英駐德公使已咨本國言俄外部在德都已將約章詳告德主及外部謂俄法聯盟與德奧義聯盟用意相似德奧義欲保本國自有之權俄法欲守舊約所准之權查歐洲各國會訂之舊約英國不應派兵駐守埃及英兵之駐埃及者例應撤回又俄土兩國之間有小國名勃而加厘亞者俄國按約能干預其內治之事俄法聯盟實爲此也此約雖定尙未簽名據此俄法尙無興兵之舉意在先與英德奧義四國理論如其不從再相機而動云 因查埃及貸英銀至四萬五千萬兩英以兵駐埃及防俄之佔其地而失貸欸也萬國公

法雖有銀出於地之說然俄之強悍又難以公法繩之俄欲英人退出埃及且以不從相機而動恐之英人究不肯從俄法亦不敢動天下事惟強者敢言之亦惟強者敢行之耳

二十八日 陰始冰

倫敦來電言中國會匪鬧教係在蒙古地方法國又擬聯合各國保護教人且約在北京商議云 因謹按法人至好事且好干預他國之事尤好乘他國之不靖以生事前此拿破侖第三干預日事又干預布事卒以債事今其流風猶未艾也世有畢思麻其人者乎

二十九日晴

近日考究美國所造快礮有五種曰吉林曰哈乞克司曰稅力司
來遠曰嘉拏曰麥臣惟麥臣之機器最巧該礮長僅四英尺九寸
高三英尺重不過五十磅礮管之外有鐵筒共間盛以涼水以防
礮管之熱其巧處在礮機能自行動礮手但照料放初一彈以後
入彈子出彈壳以及然放礮手均不必管礮機自能如意其快也
每一分時可出六百六十六彈其命中也會經試驗懸靶於一百
二十丈外可以寫麥臣之名於上云 因謹按此種快礮僅能及
一百餘丈以置山路崎嶇之地可以守隘城戰巷戰可以當關若
廣野平原敵人設開花礮於百餘丈外轟之鮮不敗矣

十一月初一日 大吉晴

本日巴黎來電言各國派員在法都議各國人民出洋業已成議凡人民欲由本國他往須由所往之國之領事驗妥方准出洋美員又謂美國雖禁客民來美例尙未嚴當由議院另立新章而法國和國瑞士國已有新例禁罪犯窮民等他往矣 因謹按美國禁工之例日益加嚴蓋不僅禁華人矣中國欲弛禁工之例美國自嚴禁工之章其禁也先自歐洲中國不能問也歐洲既禁而禁中國中國亦難爭也國有人焉未可輕量也

初二日晴

謁水師部大臣上議員紳宣文摩根談最久其意謂美國之患在南北分黨中國之患在南北交訌南患在英法北患在俄也美以

後將裂爲南北花旗二國中國則以一國力支三國雖屬竭蹶然有志振作不患侵陵視德之分支俄法猶較易也惜中國輕武重文以四百餘兆之民而不講訓練耳因謂美國苛禁華人殊不公允摩根曰華人出洋應由中國自禁美卽欲禁自應相商不應徑行苛例也此外皆應酬語

初三日 晴天氣轉暖冰盡釋矣午後雨酉刻止

日本謂與中國通商獲益甚巨蓋海鮮及山貨歐洲以爲無用而中國之銷甚多中國不過棉花米糧等物行本至輕而物至笨且運至日本仍需日本之船水脚所得亦多自二十年來所得於中國者蓋一百四十兆圓矣合一萬四千萬圓 因謹按此亦一漏

后也貨物者日出而不竭銀錢者有限而難繼故地球各國均欲貨物之暢銷而慮銀錢之出口其意深焉

初四日 晴天熱如中國四五月時

本日俄京來電言俄廷查點本國海軍船數計頭等戰艦三十六艘二等四十八艘三等八十八艘四等二十艘大小共一百九十二艘各艦共載員弁兵役計三萬五百人云 因按俄之海軍於地球各國實可列第三也英第一法第二俄第三德與義相頡頏但德之水雷艇多長於守義之巨礮艇多長於攻蓋居四與五耳此外則數美次數日次數中國而後及日本海軍之利鈍盡之矣

初五日晴

昨聞俄國自蒐軍實因考近日英國海軍員弁共計六萬八千人
有奇較俄倍又過之鐵甲戰艦六十二艘薄甲二十九艘巡海船
二百八十二艘共計三百七十二艘而現在添造之兵艦約於光
緒二十年一律可成爾時合新舊計之則鐵甲七十七艘薄甲八
十八艘巡海三百三十六艘共計五百零一艘云 因謹按英之
水師天下莫強乃猶按年加增如恐不及英人之志不小矣人所
共知也而其用意之深非沈幾者則不能測因請得而言之英國
戰艦固多然極富之國如美者悉索其賦十年後尙可幾之至於
藩邦屬國布滿各洲處處有接濟水煤之地則地球各國所不能
也而猶若有長慮却顧者何耶則以俄故也俄之水師不如英而

陸兵則天下莫強焉俄人又耽耽於土耳其勃而加厘亞諸國則歐洲之藩籬也且亟亟於波斯阿富汗等處則印度之藩籬也以俄人陸軍之強但有一處發難英卽鞭長莫及惟以水師牽制之則俄人有所顧忌而不敢逞焉蓋俄人用兵於陸所得而蠶食者其地無多其害不驟英人用兵於海恃其戰艦之強電信之捷一日之內可以同時發縱一月之內可以隨處交鋒一年之內而俄之海軍盡矣此勝算也俄人之所顧忌而不敢輕啟兵端也是夜駐法公使薛福轉來總署電言京北會匪作亂鬧教宜昌教案已結事

初六日晴夜大風繼之以雨

昨日巴黎來電言中國駐法代辦照會法外部大臣力伯言中國各省會匪政府自能剿滅無須他國保護而法廷仍派兵艦一艘駛往天津自行保護法人該報又言法國約合各國水師以啗喝中國現已接義國覆文謂此舉非出本心所願且待他國合成後再商云 因謹按法人之好尋釁自古已然前此拿破侖第一尋釁於俄英布義日奧諸邦卒敗於俄而爲英所虜近年拿破侖第三又尋釁於布藉日事以脅布國卒爲德所敗國亡身虜矣現歐洲各國日強法人無敢尋釁者則尋釁於中國越南之役法雖敗挫而創不深且又得地故覬覦之念未消也中國豈無威林屯畢思麻其人乎亦在知人善任耳

初七日雨

昨日爲外國禮拜例不辦事故今日約外部見期以午正因到外部大臣布連已待因將總署來電詳言一遍布連詢以貴政府之意何居因答曰一則謂會匪不過烏合中國已派兵合剿不難剋日盪平貴國可以放心一則謂教堂自應照約保護宜昌教案已結一則謂法國好爲要挾貴國與中國向敦夙好勿爲所動布連曰前此已電田貝今當再爲行文與田貝不准附和以表美國與中和好之忱因謝之又談少頃遂辭出因與布連交涉除禁工例外公事均不作難蓋工之禁與不禁權由議院而外部無權也且布連亦垂涎爲總統者不敢歛怨於工黨也

初八日晴

駐法公使薛來電云北洋陽電二十七八日葉提督建昌大捷建
平賊勢已蹙現山建昌進剿朝陽奉天奏報亦迭獲勝仗四面兜
剿不難撲滅請告外部並質西報訛言成 因昨日見外部外部
言中國會匪何如是之多因答曰中國人數四百餘兆甲於地球
而又政尙寬大故宵小蘖芽其間此股雖近京畿然北洋大臣所
練淮軍精銳無敵諒不日即可盪平今果然矣

初九日晴

有美人名黎宅臣者山朝鮮回美言俄國自任保護朝鮮之責云
見華盛頓昨日報 因謹按俄之覬覦朝鮮久矣蓋自日本縣疏

球法人踞越南英人佔緬甸而俄人之垂涎朝鮮愈急俄地當寒帶海口至冬必冰兵艦不能出入得朝鮮之地以其海口屯兵船則出入無阻而勢益強然不過密圖之謂共昌言自任且布告各國名不正言不順俄人未敢爲也

初十日晴

昨日倫敦來電言接印度蘭公埠電謂近日英兵在該埠南濱江戍守與中國戍軍相隔不遠華兵好放空槍擾之其在中國境界四十里之西地方名白米士鎮英人已據而有之云 因謹按俄英於印度邊界爭地而中間甌脫之地每爲所據彼疆宇日擴而我則漸逼近強鄰亦猶楚盡漢陽而中原多故也識者傷之

十一日晴

謁律司科司達已見美總統諭議院文其於義國民人被戕之事
立言至爲和順而於中國拒布萊爾事頗不慊意且於禁工苛例
毫無轉圜次日律政司又上條陳請議員於禁華工之例再加嚴
明然則欲求苛禁之除其可得乎 因查紐阿連命案其始外部
之覆義使甚囑強自義昌言絕交而美始懼遂允卹償固已形見
勢絀矣此時之論安得不和順乎

十二日晴

倫敦來電述印度之電言該處亨石尼吉地方藉俄人之勢謀攻
英界吉利脫廠臺英統領得聞信卽飭先攻泥耳脫廠臺亨民

敗走英人踞之 因謹按印度一地俄人極欲得之英人亦嚴防之巴美爾地方俄已侵佔中國邊界矣茲又欲奪英之藏臺方今弱肉強食爭城爭地無日無之亦逐鹿之世也

十三日晴

昨日倫敦來電言接北京文熱河馬賊現已盪平所擒四十二名亦已正法矣 因於初七日見美外部外部大臣布連頗以馬賊猖獗爲言因告以北洋大臣所練淮軍精銳無敵諒此姦賊不難即日盪平今果然矣竊自謂尙能料事也

十四日晴

議院開後分日謁議院紳見下議院紳好德談逾時言中國當防

俄并防英法提綱以開鐵路練兵士爲主又言昔美國南北花旗之戰北花旗三戰三敗其時鐵路尙未成也及鐵路既成調到兵士二十萬人一戰而勝從此南花旗屢敗竟無勝時此明效大驗也因避之戍刻赴律師科司達茶會入門見墨西哥土耳其公使外部總辦入餐房則爲之送茶者乃今總統之姪女也飲茶畢辭出回館已亥正矣

十五日 晴是夜風繼以暴雨

本日新報言美國賽會之事已商之中國度中國政府以美國既立條例禁止華人至美現在華商之至美者多被留難且美政府謂赴會之華人亦須議院另訂例章方准入境薄待如此未必派

員赴會云 因謹按美國此論可謂名正言順美國此際可謂理屈詞窮矣交涉之道大抵不外抵制二字一味曲從則倒行逆施自以爲莫予抗也果能如此其亦抵制之一端乎

十六日 晨起微雪及地而化遂霽日出

本日爲美國各部大臣見客之期 因謁各部僅見戶部農部兩處 昨日美報言美國兵船水手在智被害經美駐智公使照會智廷已久未覆美國水師以爲智國外作宕延內修戰備新艦造成必與美決裂不如乘此未成之時以勢迫之云 因謹按此各國交涉之故智也以勢迫之則所求必得所欲必遂勝算操矣然則將何以不爲勢迫哉

十七日晴

聞諸美國部臣言俄國約與土耳其聯盟而法使之駐勃爾加厘亞者因法國訪事人造言生事爲勃國政府所逐法使遂遞辭行之書與勃絕交俄法方聯盟而皆注意歐洲之東偏意者歐洲其有事乎 因謹按俄法兩國皆佳兵者乃俄忽用柔而法仍用剛其中作用法易知而俄不易知也然無非戰國縱橫之習也

十八日晴

本使館及各屬參贊領事等有送禮物者一概不受 謁律司又謁外部見副外部埃德因詢以本使署照會詰問禁工苛例自十四年張大臣照會至今未復其意安在埃德答以現正上緊商護

以期必復因詢以母乃空言搪抵埃德答以決非空言因再三敦促遂辭出

十九日晴

戶部總辦來見言美國擬以粟米數千頓賑濟俄國饑民又言法國新修稅則又詢中國北洋大臣李傅相之疾言倫敦來電謂李傅相得感冒頗重已有數日病臥不能起因謝之因謹按中國稅則所取於入口之貨均按百抽五無所分別此所宜亟修也李傅相勦平粵逆又平捻匪爲我

國家柱石中外重之今得感冒至於各國電聞此萬里長城北門鎖鑰也因惟祝其勿藥有喜以保昇平焉

二十日晴

美副戶部札與墨西哥毗連之稅關言墨國鐵路公司招到華工一千二百人失業必將有潛入美境者飭加意嚴防云 因謹按墨與美接壤天時地利相似礦產亦多而貧富迥異者則經理之人殊也既招華工矣而又聽其失業雖未言其失業之故想必因經費支絀而停工也然則極貧之國雖有自然之利亦難興矣

二十一日晴

外部大臣訂送上議院紳布倫之葬午正往議院入中門至東偏大廳各國公使先有到者以後陸續而到至未初同至中堂議事處副總統及下議院長在正中南面並坐教士在其前亦南面坐

議紳在東南向西北坐各國公使在西南向東北坐總察院在公使之前一層坐向同總統及各部大臣又在前低一層與樞近坐向亦同其在樓上者分四層環坐教士宣講約一時辰昇柩去議紳有送至舟者各公使皆返

二十二日晴

寅刻興盥洗畢率參贊隨員等拜

牌行三跪九叩禮辰初設麪中正設醺醺後出門謁律政部各大臣聞法國以勢欺凌勃爾加厘亞國法使之駐勃者遞辭行書以囑喝之茲美國於昨日接巴黎來電言法外部接法國駐德公使文稱德國政府於此一事力助勃廷且謂法廷因此小事力絕邦

交殊屬無理云云 因謹按法固好橫行者而於中國尤甚此時又用之於勃國以爲勃可欺也而不料德國之明目張膽以助勃也且嚴辭厲氣以譏法也好勝者必遇其敵此之謂也

二十三日 晴夜雨

是日爲各部見客之期因循例往見僅見副戶部又謁檀香山公使爲華人事也 昨日報載俄京來電言俄國武員謂應於此時取高麗俄廷則謂兼并高麗難於如願惟不許他國強佔高麗以防有礙於俄云 因謹按俄員之言實肺肝之見也俄廷之言乃掩飾之謀也俄豈一日忘高麗哉待時而動防有力者之妒之耳應早備之

二十四日大雨至未刻而霽天氣燥熱如五月時

是日爲議院紳士見客之期因帶繙譯謁十六處僅見福來克耐
二人紐約本日報言倫敦來電謂英駐華之水師提督已赴朝
鮮琿春一帶爲巴美爾事也又言中國如以臺灣給英英國將助
中以拒俄云因謹按此英人之以言餽也中國斷不爲也如果
爲之是前門未能拒虎後門業已進狼矣竊嘗兼權俄英之勢焉
俄爲患在北英爲患在南俄爲患在陸英爲患在水陸患尙可防
而水患無可防也俄患遠而英患邇俄之患也不過北邊一面其
進兵也難英之患則北省如天津南省如浙江江蘇廣東福建皆
受之若沂江而上則安徽江西湖北又受之其進兵也易且英能

助中以勝俄則要求無厭勝固受其患也英不能勝俄而俄入北境英人之狡將乘中國之力繼而趁勢以求沿海各埠不勝亦受其患也且兵未交而先失地明者決不爲也咸豐十年之亂俄人乘勢以取黑龍江北岸地方此前鑒也故以爲中國斷不爲也爲今之計惟有造鐵路以合南北之勢築礮臺置水雷艇以固各海口之防及今爲之尙未晚也

二十五日 陰天氣仍熱

是日爲美國令節送外交處議紳綢茶共八分 此次開議上議院紳共八十人下議院紳共三百三十六人而遞條陳禁華工者計三百五十五人 因查美國國例總統由民舉議紳亦由民舉

其未舉也必先要結民心將以求舉也其既舉也必求允洽民心所以報舉也美國土著係苗陳一種與黑人相似不歸王化畫地而居其居中土爲民者皆歐洲客民耳願歐洲客民入美籍而中國客民不入美籍入籍者得與舉不入籍者不得與舉而親疏向背之勢遂冰炭不侔焉誰生厲階至今爲梗哉

二十六日晴

是日爲外國吉辰不辦事不見客 本日新報載法國與勃國齟齬一事德國昌言助勃矣茲彼德堡來電言俄廷決意助法云因謹按此歐洲不靖之萌芽也勃小國耳法人陵逼之者其慣技也而德人助勃法幾無能爲矣乃俄又助法德以一國支兩大力

能勝乎且俄之與法聯盟也卽昌言干預勃之內政矣今有待而發是德則無心而俄則有意也地球風氣至於如此苟不富強其何以立國哉

二十七日晴

華人周某持出使美法義比大臣護照來見言赴詩家谷賽會請照美外部因謂我政府方以美國苛禁華人派員赴會之議未決本署未便輕照外部當由參贊帶見外部總辦可也

二十八日晴

是日爲總察院見客之期因帶繙譯往謁見不綠瓦哈輪不來履斐路四人餘五人未見因見斐路夫人時座中有婦年約六旬

言美國之禁華人殊爲違約因答曰美經營草昧僅一百年而富強如此之速者鐵路之力也創造鐵路如此之速者華人之力也今可謂飲水忘源矣婦以爲然

二十九日晴申正以後雨中夜大風

謁下議院外交處十三人見麥克力安多羅二人皆在客寓言近年各國整頓水師自爲至計但鐵甲戰艦需費數百萬金告成須四五載惟水雷艇則造易而費輕查法國有鐵艦四十三艘水雷艇一百九十艘茲又添造水雷艇三艘一艘已成計長十四丈二尺寬一丈五尺容一百零五噸載兵弁二十六名有速放礮二尊放水雷之管二枝分置船前船後前管不能動後管可以擺左擺

右每半時辰可行二十一海米又半合中里七十餘里如此之速鐵甲船難恃矣。因謹按水師之用鐵艦利戰於海中雷艇利戰於口岸一長於攻一長於守故英多鐵艦而德多雷艇其志可知矣中國之創海軍遠略未遑但能保守各口岸使敵國戰艦不敢輕來則足以固吾圉雷艇似尤重焉因聞其言切當特歸而誌之三十日晴

是日爲上議紳宣文嫁女吉期因已備禮送嫁矣今日遂往道喜午刻總統各部各公使均到成禮時主婚者先詢女郎曰汝願以此人爲夫矣答曰願又詢以後或貧或富或疾病或康強至老不悔矣女郎一一如所詢對次詢其夫亦如之禮畢總統以下均與

二人握手遞辭出女郎遂別父母偕其夫出遊此美俗也

十二月初一日 元吉晴

是日爲各部議院紳見客之期因謁二十一家只見副戶部一人談及美與智國齟齬美國方整飭船廠一切智國亦向歐洲各廠購辦軍器且派員赴德國學習軍法美廷卽電飭本國駐歐各使密查智員動靜談未久辭出因謹按智利自勝祕魯後靡然自大從前中國向索商民所失賠欸峻詞相拒中國不與校也今該國內訐日國已索賠三百萬矣美又以其侮本國使臣欲相問罪竊料智非美敵也有不卑禮求成者乎

初二日晴

是日爲美國元旦總統於午初見各國公使以次見各部大臣兵
官及紳民因率參贊等覲總統後卽往見外部大臣并謁各部申
正而返 聞美國官場言中國馬賊已平東北地方又有賊黨萌
動幸李傅相病已痊愈卽派馬隊往勦云 因謹按外國電綫之
便音信之靈宜共事易措手也至李傅相感冒則以爲可虞及茲
病痊又以爲幸爲教民幸乎爲寓華之商民幸乎不可知也因則
爲

國家之保障幸焉

初三日雨

美兵官魏禮森來見言美國北境卡拿大地方英屬地也近有願

入美國版圖之議緣英國屬地各洲皆有共最大者爲澳大利亞此外殊難悉數英國政繁其於屬邦外交事務隔膜不能浹洽故卡拿大願隸美籍澳大利亞亦欲改爲自主英國官紳不以爲異且謂不妨從之以省英之越俎云云 因謹按此當爲英人之度辭也法與俄合英之海軍勢不敵矣而各屬邦遠在異洲非兵船無以控制兵船勢絀則令有所不行不得不知難而退故先爲此言以文飾後此之形見勢絀也

初四日

晴午正大風雨雪止仍見日
逾時又飛乾雪日光如天晴時

起程赴瑪林公司驗槍是夜宿紐約 初二日報言巴黎來電言德相畢思麻告退今已三年自俄法聯盟德皇內怯措置內外情

若梵絲近已屢派大員密赴畢思麻第商令出山但不知畢相允否耳 因嘗讀漢史至飛鳥盡良弓藏又讀唐詩至時危身赴敵事往任浮沈未嘗不廢書三歎也德之霸也由畢思麻德皇承祖父之舊業而不任舊人以爲可從容坐理矣不料俄法聯盟英國既以屬地爲憂德皇能不以尋讎爲慮急而求子是寡人之過也德皇有焉至於電報來自巴黎則知德皇諱之而法人揚之其揚之者所以顯彰德皇之短而實內懼畢相之長也

初五日

晴是日華盛頓大雪而紐約晴
蓋相距已千里天氣不同也

辰刻瑪林公司來引導因帶繙譯武弁仍附火車已正至紐海芬地方換馬車行十里至廠廠中已豫備卽抽驗五十枝均爲靈使

驗畢約申初矣當令該廠具結其餘悉照此樣仍回紐約時已成
初飯後赴火車廠正交亥初中夜奔馳至卯初到華盛頓往返約
二千五百里 因查以前中國購用槍礮悉於上海向洋行定價
交貨其價則洋行中飽不肖委員又從而浮銷故多不實其槍礮
又非新式新造大抵多以舊式改造者弊日滋矣自奏定章程由
駐各國公使驗收而舊式改造之弊絕焉

初六日 陰 入使館是夜大雪

近聞俄國築造西比里亞鐵路之員名卑書富至金山金山人員
訪詢情形言自俄京以東計一千七百米

合中里三千六百餘里

業已築成

至全路工程約十二年可竣沿高麗之一段約二百餘米

合中里六百七十里

里現作工者有五千人明年可增至七千人云 因聞此而先爲高麗危也俄高通商自有水路且商務亦甚微細安用鐵路爲哉可因此而窺其心矣

初七日陰

本日巴黎來電言勃爾加釐亞國驅逐法國報館訪事人法國詰責勃廷勃廷覆以訪事人藐視勃廷先已照知法國駐勃公使禁止迄無斂戢勃廷不得不保全國體也勃小國耳竟不畏法之決裂而爲所挾持也 因謹按挾持之習不可開也開則一事如是百事皆如是矣一國如是各國皆如是矣況法又好挾持者也拿破侖第一挾持布奧日等國而敗於俄英拿破侖第三挾持布日

各國而敗於德蓋風氣使然矣勃以小國而抗法但不知其究竟如何或有密交之國爲之理斷或有強大之國爲之主謀則庶乎其可耳

初八日晴

謁總察院上議紳不來奔宣文律師科司達外部總辦播郎 昨日報言巴黎來電言羅馬尼亞國與俄毗連一千八百七十七年即光緒三年俄土交兵俄君謬爲與羅君友善假道入土耳其之境獲勝凱旋時乘勝奪羅國一省之地羅君未之忘也今聞德奧意聯盟遂於前日赴奧國之跋司埠面見奧王商議時事云 因謹按晉假道於虞以伐虢旋師滅虞劉璋藉劉先主以拒張魯卒

以失國然得地者祚皆不長此往事也

初九日晴

下議院紳思麻來見言及日前戶部派員查華人由英屬卡拿大潛行來美且有美國多人挈帶一案今已查明實無其事只兵丁一名暗助華人過江而該處入境之華人業已減於昔日云 因

謹按此實情也美國工黨妒忌華人此外皆不然蓋工黨爲攙奪其工而工黨之外實喜華人之工價廉也顧工黨甚衆而又有舉總統議紳之權總統議紳無不徇之此華人之所以屈於工黨也
初十日晴

外部總辦播郎來謁并持總統及后謝帖言謝中國茶會且許代

爲照料茶會之事談次言初八日巴黎來電稱埃及國王已薨該

國前王曾借英國銀一百兆磅

合中國銀四萬五千萬

而不能償英廷與各

國商逐前王而立其子是爲今王至一千八百八十二年埃及內
亂英國爲撥兵削平之而遂留兵駐埃及法國不允屢詰英廷令
其撤回英駐兵如故今埃及之君已薨法俄方合且俄君已有不
願英兵駐埃及之言恐不免決裂云 因謹按歐洲之勢擾攘無

安定時其不遽相見以兵者兩強相當未敢輕發耳英固強矣然
俄與法合則英之水師不敵兩國卽英之陸師亦不敵俄國勢力
不均則一有齟齬強者必先發難英人於埃及之事將何以善其
後哉

十一日晴

昨日金山來電稱該埠新築礮臺已由華盛頓運到八寸口徑礮四尊連前共有八尊尙有十二寸口門者不日亦將運到云 因謹按美自紐阿連民人殺斃義人不肯辦抵議卹義遂齟齬美亦慎固海防皇皇焉如不及近又與智利齟齬智國水師雖不敵美然蠶蠶有毒亦應未雨綢繆也美國船廠礮廠林立其籌守實不難非若購自外邦者之緩不濟急也故優爲之

十二日晴

是日副總統訂見總統因於亥初偕繙譯乘車至副總統宅今年官紳似不如去年之多僅見內外戶農郵政五部議紳十餘人公

使則英法俄德朝鮮日本中南墨洲諸小國婦女則不減於去年
亥正總統副總統出見握手爲禮各就大餐房飲酒進饌子初而
散

十三日 晴夜雨

是日總統見各國使臣因於戌正偕參贊繙譯各員往及亥初而
到齊以次入見握手爲禮總統見使臣後民人之入見者至亥正
而猶未止因等於亥正回使館矣聞美國與智利齟齬一事外
部已商之總統總統已諭商議院時論多以智利海口實爲天險
不易進兵將欲假道祕魯由陸路而入將來戰勝卽脅智利所踞
祕魯之地還祕魯以爲酬此意不知能行否尙待審慎而發云

因竊意此美廷之計也如此則智利增一敵祕魯既可復讎而又得還所失之地自願假道此策果行而智利危卽未行而智利亦先自危安得不降心以相從哉

十四日雨

巴黎來電稱西歷元旦德主大集武職大員密諭逾時御前侍衛均不與聞想係不日用武云 因謹按法與俄合自以爲德必畏之矣乃德主只勵精講武而於法國仍視之蔑如法則時時窺其動靜其言若有畏焉何法之鳴張跳梁向之好凌轢他人者至是而甚畏人之凌轢也勇怯勢也

十五日 雨午刻而止寅以後大雪

是夕本館舉茶會自總統以下均於前十日具帖屆時總統之長子挈其婦到大將軍外部及各部大臣總察院上下議紳各國公使均到外部大臣向不赴茶會是舉爲破格會者逾千人車馬擁擠延及通衢亥初到齊寅初而散香冰酒用至二十箱他酒猶未計菜與水果茶點計二十餘品呂宋煙大小十二盒堂倌十餘人伺候易衣服者稱是巡捕六人可謂盛矣 因查外國新年舉行茶會延請無虛日不能盡辭也又不能受而不報故一效顰而所費多矣不可再也

十六日 大雪約深一尺至申正而止

美紳爲因言巴黎來電稱德主舉動令人疑慮近日忽然優獎提

督阿勒芬所黎賓蓋以該提督於一千八百七十一年卽中歷同治十年敗法兵於離蔓也此時忽又獎之者將以收德弁之心而激法人之怒云 因謹按法之搶攘爲雄者向自以爲一怒而天下懼莫余敢侮也今德主乃欲激之使怒若惟恐其不怒也者殊不可測也 因家居近山嘗見捕虎者矣虎之攫人及獸畜也有持挺刃追之者虎乃故遲遲吾行焉且時返顧作怒目之狀追者雖衆無敢近逼虎終銜所攫者以去人莫可如何也追者返乃約獵戶偵得其巢穴遂集獵者挈槍而往如牆立排穴前虎不敢出乃束火而燎之虎怒奔出眾槍齊發遂斃之德主之川激也意如斯乎

十七日晴

拜發條陳摺昨日新報言英法兩國於埃及國爭權法國本擬於埃及舊君新逝新主未立之時與英理論無奈歐洲各國無助法者俄雖與法聯盟此時亦不助法惟密戒法毋妄動法國獨力難支悉聽英之所爲以期異日英國報以他益現在不過照例詰問英廷掩飾耳目顧全國體而已 因謹按法人之於中國侈然自大其於歐洲頽然自廢始以爲不可解也顧嘗見齷齪者之情形矣其於遜己者百端陵之不論理也其於勝己者百端讓之亦不論理也地球各國局面大抵如斯法又甚焉然地球大國之受挫折者亦拿破侖尤甚焉天道好還事有必至論事至拿破侖之末

路未嘗不少舒抑鬱不平之氣焉

十八日晴

湖廣總督張之 電請購美國棉子茲已由農部大臣於鄉間購成由大西洋運鄂矣 因謹按美國特設農部專司播種之事錢糧出入另有戶部司之中國戶部亦稱農部但司地丁錢糧戶口而播種則聽之民美國每年戶部出入計銀三萬數千萬圓較之中國幾四倍而其事反簡者則以有銀行而可省收發之煩用銀錢銀幣而可省驗平驗色之煩有火車而可省解運之煩也事不煩則弊不滋故未聞有劫餉鞘虧庫欸扣平色之事其制之善有足擇焉

十九日晴申後小雨

是日爲總察院見客之期因往謁勒馬布郎不賚之福穀磊均見
又謁下議院紳斯斌介亦見聞華盛頓礮廠近造成六英寸口
門來復礮二十尊八英寸十英寸者十六尊每尊造成只五十日
又水師部造成十二寸口門者一尊需費四萬五千圓其六千圓
係工價重十萬四千磅約四十餘噸較由外國購者價省其半云
因聞此而知機器廠之不可不自營也能自造礮其便有一其
利有五兩國交兵各國守局外之例不准售軍器茲則不需外購
其便一也價省其半國帑不糜二也鋼鐵之產不棄於地三也中
國人多營工而食四也風氣日開日漸富強五也地球之國其富

強者大抵皆自造兵艦鐵路槍礮者也其貧弱者大抵皆外購兵艦鐵路槍礮者也其不能自存者大抵皆不能講求兵艦鐵路槍礮者也今衆說龐雜無從適從盍就實在情形而靜驗之

二十日 小雨是夜下雪

是日爲下議紳見客之期因往謁見勃郎姐門三奮克力火街五人克力爲嘉省人出金山新禁華人例相示因婉託之因於此而歎禁工之例未易爭也議紳由民舉當其舉也卽先以禁華人要之允之則舉不允則置之其願爲議紳者無不許以禁工矣夫美國之人固無不願爲議紳者矣難矣哉

二十一日晴

本日爲各部大臣見客之期因謁各部見兵部副戶部聞南墨洲之威內薩國東鄰英屬地英人屢侵其界威請與英分畫界限英又畫過威界威不敢爭因商請局外之國公斷英亦不允蓋其地產金故英人欲之也近求美廷爲代中理云因謹按此弱肉強食之風氣漸偪墨洲矣中俄交界之地俄人無日不思侵佔每與勘一界俄必進佔數十里蓋其地多金故俄垂涎焉今漸偪近矣數十年以後邊防其費手乎

二十二日晴

本日爲上議紳見客之期因往謁見宣文多福福來地甫司不來奔聞英國商務局刊出年報本年購茶二百零二兆磅印度居四

之三
中四僅五十二兆磅計三千九百萬觔 因籍隸安徽地多
山民多業茶父老言四十年前荒山日闢民資茶以生者居其半
近二十年中茶價日賤而稅不減除納稅以外所獲甚微故茶山
多任其荒矣轉移之機是在關心民事者

二十三日 晴 紀電

美國近日爲與智利齟齬之事催遣兵船赴智日有所聞而智利
亦向英法兩國定購兵艦法國爲智利所造之兵艦名開撥頓白
來者不日成功其中有電氣礮尤爲靈便每一時辰可行一百二
十餘里而美議院亦定於二十六日大議焉 因嘗讀易至安不
忘危治不忘亂之言而參以周禮蒐苗獮狩之義而知古聖之用

意深也戰不常有而欲戰之事無日不有戰局不可自我興而備戰之道不可不先時而興蓋兵力可以戰則敵國將不欲戰而戰局不開是以能戰而止戰也近日英法爭權於埃及法與俄聯盟以敵英俄外部且昌言英之非矣乃英人毅然行之而法人拱手讓之俄且戒法以勿妄動焉非皆攝於英之兵力哉美固強於智利然越國鄙遠未能決其鞭長之必可及也故以全力籌之是日至紐約赴塞潑席中夜回車

二十四日 晴夜雪

辰正抵使館 昨日報言俄法聯盟英國始則望其不成及其既成又欲解散其交故於本國駐俄公使莫里雅患病請假回英後

又復屬其至俄蓋以莫里雅與俄政府相得所言易入如俄不附
法而與德親不至決裂則戰局可不開此英志也 因謹按歐洲
各國俄與法皆好事者因嘗於俄法聯盟之初詳論之矣中國教
案英法有意挾持並約義美各國英則始急而終緩法則終始啗
喝幸義國向惡天主教而美政府又從因言不與聯盟故法願不
遂也莫里雅與俄政府相得英廷不以病而棄之用意深矣

二十五日 晴謝神祭先

昨日塞潑席間有某察院及前總統格蘭脫之子言美國擬開尼
格拉之地以通東西洋此工若成則商務益盛因答以此工如成
則中南墨洲之小國必遭大國鯨吞本日見新報言南墨洲之厄

瓜多國整頓武備將棄舊式槍不用而易以奧國之曼里加爾快槍云云是該國有戒心矣

二十六日晴

是日謁議紳摩根克類狹麻阿倫麥豈力斯斌介又郵政大臣宴總統請各國公使各部於本宅見總統因於亥初往見又往議紳奧地士處茶會返館已子正矣斯斌介言美於智利齟齬昨日總統請議院議之北黨以爲應戰南黨以爲不宜開釁遂令再議云因謹按美國開國之律由華盛頓訂定政歸三處立例者議院行例者總統守例者察院議院有立例之權則大事爲議院主之總統不過奉行焉耳蓋議紳總統皆由民舉而總統僅二人不及

議紳之數百人者但能公而不能私爲民而不爲己也故事之創者必由議院決之此美國之創制顯庸也

二十七日 晴夜大風

是日總統訂於亥刻見議紳察院并見各國公使因率繙譯亥初而往見總統後又見各部大臣并議紳宣文狹麻斯斌介談次智利因美整頓兵船議與開戰已有轉圜所有前此殺傷美國兵船水手已允卹償言歸於好矣 因謹按當今之世有理而無勢實不能以理屈人也美民殺斃義民義廷詰問美初不肯卹償乃至義使絕交離美美始轉圜今美之於智亦猶義之於美也美之水師不及義智之水師不及美然非實有決裂情形仍不就範則交

涉之窾要可得端倪矣非兵力勝人斷不敢與人決裂非兵力勝已斷不肯舍己從人公法不足恃條約不足據惟勢強者乃能伸理耳有國者不可以不強

二十八日晴

謁外部大臣布連爲將赴古巴辭行也布連言美國駐古巴領事勤能一切可以照料當爲通信因謝之 律師科司達來見言於外部處聞因將赴古巴特來送行因詢以智利之事言可不戰然尙未就緒因又詢祕林海峽之案答以美與英兩不相讓已商定再派員妥議日內爲此甚忙碌也 因嘗讀孫武子兵法謂勇怯勢也強弱形也不禁喟然歎曰此孔子所謂誠之不可揜也強弱

之形因彼己而分勇怯之勢卽因強弱而別強與弱遇則勇美之與智是也弱與強遇則怯智之與美是也兩強遇則不怯亦不勇英美是也不怯則不相讓故英美齟齬駁詰者至於一年不勇則不決裂故英美終不以兵戎相見而宛轉相商也孔子曰能治其國家誰敢侮之此之謂也

二十九日晴

昨日羅馬來電言德義奧之同盟本以外防俄法而不料有內憂蓋以奧民羣奉天主教而義則視若仇讎兩國民心因此不洽德皇力顧大局婉勸奧皇致意義國委曲調停使國內不致交訐教皇亦不與法構結爲患現聞奧義兩君屈意從之可保昇平之局

矣 因謹接地球各國莫不有教大抵入主出奴惟孔子之教則包所有亦空所有一視同仁焉然自宋以來業已分黨顯作異同至明則每下愈況矣自洋教入中國庶莠民犯名義君子嫉之而激烈之士顯與爲讎狡猾者又藉口爲亂焉則不慎於始之咎也中國每開教一次則教勢愈盛一分由兵力不足而民教之理不能持平也可勝慨哉

三十日晴

聞日本改鑄銀錢大獲利益近按年鑄出計一千萬餘圓中國及大東洋來往之商均多便之流通漸暢每年獲利至六七十萬圓云 因謹按泰西各國皆自鑄銀錢防利權之外奪也而便民便

商更有言之而難盡者中國南省所用之銀錢向爲墨西哥國獨攬其利計近百年矣商民便之至以重七錢三分之低銀作重八錢有餘之足銀現上海雖改用鷹銀而安徽江西各省尙仍舊也中國苟自鑄銀錢則利源不外漏矣

蓋觀於今日之交涉而歎天地之狹人心之險也禍患每生於萬里之外兵戎卽兆於玉帛之間無可避也無可遠也天下之強國首推俄其地跨歐亞兩洲皆在萬里之外而兵力所及卽足爲患其在歐洲也兵逼德界則德有戒心逼奧則奧有戒心逼土耳其波斯阿富汗則不僅有戒心而直有覆亡之慮矣其在亞洲也造西比里亞之鐵路增琿春之兵建黑龍江之船塢則我有戒心而

朝鮮日本亦不能無恐美與智利分赤道南北而因兵船水手一案幾至搆兵英人由緬甸造鐵路以規滇法人由越南興火車以達粵阿非利加洲亘古以來鴻荒未闢而歐洲各國羣起而分裂之皆遠隔萬里者也德奧義聯盟以防俄法此玉帛之會自守之見也而俄與法聯盟俄又與土耳其聯盟俄之與法與土實世讎也德法有不可解之讎而結好無間亦牴牾時形美因喀羅連島教士之案而責義英因祕林海峽之案而責美俄法因埃及之事而責英俄因勃爾加釐亞之事而責德中國沿江會匪鬧教之案興而法欲聯歐墨亞洲各國水師以要挾雖好會無間而擾攘不休居今之世奚可局淺近囿耳目而高言耀德休兵哉水師之力

英之兵艦至五百有零法稍遜之俄又遜之次則義德日三國亦可稱雄美國水師居第七中國居第八日本居第九日本今年以水師之力不敵中華乃於法國訂造鋼甲三艘亦勉企及之意也法與日美與墨互增入口稅以相抵制法重美國豬肉入口之稅俄增英國棉紗入口之稅烏拉乖墨洲小國耳亦增入口之稅以足國用義禁美國煤油入口美禁歐洲窮民入口皆內政之可自主持者也若夫美國之近政則駐美之使尤耳熟能詳焉其測天文也則有算學諸士挾貲赴祕魯以測南半球其測地理也則有商務諸人赴尼格拉以通東西洋水道其講海防也則建礮臺於太平洋購聖駝馬島於丹國增海口之巨礮造極速之兵艦講

求礮穿兵艦塞漏之法措置兵艦中途添煤之地試白鐵之甲造
電氣之船其蒐軍實也則造無煙之火藥至猛之炸藥創鋼綫纏
身之礮試電氣之車考連珠之礮煉礮精以代鋼藉水力以生電
其講富國也則與歐洲墨洲各邦立報施條約增入口之稅收丁
口之費禁入境之彩票賽珍於希卡果免稅於夏威夷鐵路入欸
四千萬有餘本年所入之欸至四萬六千萬有餘直駕英國而上
之矣至於博士新得致雨之法隨時隨地可以立沛甘霖其說不
經乃聞農部已撥巨欸試驗各省亦且以貲定購則又似非子虛
相距較遠未能目覩姑志之以備一說云耳

美日祕使者誌於美國華盛頓使館時辛卯十二月